

## Reality připóznawać a je wobdźělać

**Tež spisowaćel Křesćan Krawc rozmysluje wo aktualnym položanju w Serbach a wo naležnosći Serbski sejm. Jeho mysle tule dokumentujemy. Jedna so wo měnjenje jednotliwca, kotrež njekryje so w kóždym padže z tym redakcije:**

Hdyž so rozdwojenja, wadžeńcy a boje wo legitimowane zastupnistwo Serbow njeskónča, so my Serbja – byrnjež w zbytkach přeco něšto wot nas zwostanje – w kategoriji žiwych narodnosćow we wotwidžomnym času zhubimy. Bjez wulkeho hódnoćenja, sudženja, bjez wumjetowanja dyrbja so přećiwo sebi wojowace kruhi, gremije a wosoby do zhromadnosće namakać.

Jako přenje by trjeba było, wšitkich tuchwilu přistajenych nawodow a runje tak wolenych zastupjerjow towarstwow za kulojte blido zhromadźować a njehladajo všeho, štož je było, so na zhromadne postupowanje dojednać. Wo t kulojteho blida ma wuchadžeć sprěnja: Štó – kotra wosobina – přewozmje w narodnym hibanju zamołwitosć nawody! Zduha: Hač do hdy ma być statistisce zezběrane, kelko substancy hišće mamy – štó so jako Serbowka/Serb wuznawa, kelko serbsce rěčacych swójbow hišće mamy, što Serbja wot swojeho nawodnistwa wočakuja! A střeća: Zjednoćmy so, hromadźmy so k cyłoserbskemu zetkanju!

Trjebamy koncentraciju substancy, koncentraciju mocow. Wob lěto jónu měli so Serbja k cyłoserbskemu zetkanju zeńć. Wone móhło rěkać Serbska zhromadźizna abo Hłowna zhromadźizna, Zjězd Serbow, Schadžowanka abo Narodna zhromadźizna. Zjězd měł być zetkanišćo wšěch k serbstwu so wuznawacych a so za serbstwo zajimowacych – z Łužicy a zwonka njeje. Na cyłoserbskim zetkanju měł so předstajić a wuzwolić najwyši, Serbow zastupowacy gremij. Wólby, kotrež měli so pod sudniskim dohladom wotměć, bychu juristisce plaćiwe byli.

Bjez hódnoćenja, bjez sudženja, bjez wumjetowanja dyrbimy přećiwo sebi wojowace gremije a wosoby do zhromadnosće zwjesć.

Do směra na zjednoćenje měli z nawodnistwom Domowiny a sejmikarjow kaž tež Załožby za serbski lud za jednym blidom wo namjeće/koncepcje zjednoćenja wšěch mocow jednać a so dojednać na to, zo wšitke mocy zwjedžemy do zhromadnosće k wuchowanju našeje narodnosće!

Zwostało je nam poslednje hrodžišćo – zawdajmy sej ruce!